

MÄRKSÕNA: RÄNIKIVI

* * *

tule üü ja tuul puhk
uulitsa päält ärä kõik seo massin-ime
tule päiv ja vesi uht
perve päält ärä kõik su latselatsi nime

ja tule aig ku nõse kuu
ja lindiug istu väräti takan
ja sõnajalast saa jälleki puu
ja mia peränisilmi maka

ja mõtsapini kand
musta päivä suun

MÄRKSÕNA: RÄNIKIVI

Ugandi aig

*Ma lää emä nink esä manu
tartu kiilde pakku.
Tuu om üits illuss minek – niigu
tõiste ilmajakku.*

-- Mats Traat, „Pagulane“

I

Ole ma jälleki paon üte ränikivi seen.
Luuletajahääle kõnelava minuga.

Melle me kõik egä kõrd siiä jooseme
kui kerkokell lüümä nakka?

Karmani ommava tühjä, suu lämmit sõnno täis,
„Wastne Testament“ sällän paunan.

Suu lämmit sõnno täis, käe sambladsen minevikun
ma lää ja mõtle, et kae kos, mäanne imevikur.

II

Mia ole rikass miis,
mul om üits hame ja üits *särk* om kah.

(Ja konnegi om tõne hame viil,
selle et avvustusest ommi lõunepoolitsi
naabre vasta ole taa endäle ummelnu.)

Särk om rohkemb käeperi,
a hame om meeleperi.

Hame om kulunu nink mulkligane
ja konnegi om üits Arula miis,
kinkal kah üits sääanne hame om,
inne palju illosamb.

Mu edevanemba olliva kah Otepää inemise.
Pallu rohkemb näist ei tiia,
a mõnikõrd nä nakkava minuga kõnelama
ku ma sõnnoga papre pääl tuld tii.

Selle et:
kõge paremb valgus om küll seo, mes ummogu esi tule
ja kõik hää nakass sääl, kon *ärä kistunu ommava surmatule*,

a ku tahat, et süämen ja engen viil edesi eläs su kiil
sis läitä esi tuu säuk, minka man lämnen ja valgen olla saat!

III

Suu lämme sõnno täis,
eng pailaga kaalan,
lää egäväst tiid piti,
seod ahtakset viirt piti,

ku om viil
kohe minnä.

Hüperborea lootsiku

Laiva läävä Hüperborea poole,
kon ootva, et maaviir vasta tules.
A vasta tuleva inne nä, kiä elo pääle
uma märgi jätvä, hoidva ja keeldvä.

Me oleme kõik meresõitja –
oleme jo mäki vaihelt ärä kisutu
ja laivo pääle pant.

Reis lätt harva kõrda:

perätult näe vaiva,
mujahta ja pure huult,
oota valget laiva
ja hüvvä pärituult.

Kolm tähendämissõna

*

Ma pimmen koba ja otsi tikke.
Lätt nii, kui ennäst raputa,
et kaalast vai eitä ikke.

Olet Eesäv vai olet Jaakob,
üitskõrd piät esi saisma.

*

Konstantinus:
kui sa pilvi vahelt paistnu märgi
all õkva taplusde lätsit,
kas mõlit sa sis, et konnegi om üits
Naatsareti miis, kiä ikk?

*

Kõik ollev tühisusi tühisus.
inemise elo inne tühä tuule püidmine.
A ole inemine sis tuulele
havvakajuja vai vanamuts?

Kerkokohus

Ku nõid maha astuss ja es pala enämb tuleriit
sis kõik süü umale võtt üits halastaja samariit.
Kohtumiis vihatsele uma troonil istuss
ku tuleriit kohtupäiväl ärä kistuss.

Taa om taa p r o t s e s s,
midä kõik aig om ihadu.
Taa om taa p r o g r e s s,
midä kõik aig om vihadu.

Aolugu

Ma istse Petrogradi liinan kartsan,
seie viletsät leibä.
Tulli revolutsioon.

Prantsusmaal oll kah riigipüürmine
ja Bastille viiti lajale,
a siin ehidi vangimaja suurembass.